



## Terenga 3: Hōtaka 35 - He Kīanga Whakapae

### He Mihi

He heru iwi, he piki kōtuku, koinei ngā tohu o te rangatira o whakapata. Āpiti atu ki ēnā he arero Māori me tōna puna whakaaro Māori, kātahi nā ka rangatira rawa atu i te ao nei. Nau mai, e rau rangatira mā, ki te hōtaka nei o Ako.

### Hei Mahi Whakarongo

E uiuitia ana a Shane Jones e te kikopuku nō Ngāti Hine, e Waihoroi Shortland. Anei ngā pātai hei whakawhāiti i ngā whakaaro i a koutou e whakarongo ana:

- 1) Kei a wai te mana whakahaere i te takutai, hei tā Shane?
- 2) He rerekē te marea me te Karauna, hei tāna?
- 3) He aha rā ētehi kupu e tohu ana i tana mita?

### He Whakamārama

Ka whakamahia te kupu 'whakapae' mena kāore koe i te tino mōhio mena e tika ana tētehi mea.

Kia titiro tātou ki te kupu nei, 'whakapae'. He tūmahi i ētehi wā, he tūingoa i ētehi wā.

tūmahi - E **whakapae** ana au ka toa te tīma Chiefs ā te Rāhoroi.

tūingoa - Ko taku **whakapae**, ka tutuki te mahi hei te marama o Haratua.

### He kīanga whakapae:

Ki te kore koe e āta mōhio ki te nui, ki te tokomaha rānei, anei ētehi kīanga hei tohu i tēnā āhua:

- Tōna...nei (pea)
- Kei te takiwā o te...
- Āhua...

*Tokowhia ngā tāngata ka tae mai?*

- Tōna 500 pea.
- Kei te takiwā pea o te 500 te hunga kua rēhita.
- Āhua 500.

### He kīwaha whakapae:

Kua mārena kē a Mere. **Māna?**

- Kāore te kaikōrero i te tino mōhio mena kua mārena a Mere.
- Kei te hiahia te kaikōrero kia whakatikaina ana kōrero e tētehi atu.

### Hei Mahi

**Tēnā tukuna ngā whakapae hei whakautu i ēnei pātai:**

1. E hia ngā iwi puta noa i te motu?
2. Tokohia ngā wāhine Māori i Aotearoa?
3. E hia ngā Kura Kaupapa Māori i Aotearoa?
4. E hia ngā piro a Julian Savea i tana kēmu tuatahi mō te Kapa Ō Pango ki a Airini?

### He Whakautu:

1. Tōna 80 nei pea.
2. Kei te takiwā o te 250,000 ngā wāhine Māori i Aotearoa.
3. Āhua 100 pea nei.
4. E rua pea. Māna?